

Git mtu'ub Pabl ndo' Filemón

Le'a Pabl mke'a git ndee ndo' Filemón, dub xa no nak xmen Cristo ncho gezh Colosas. Le'a xa wa uzhe'eb dub xa rik. Le'a dub xa nsalea' Onésimo dub esclavo ten Filemón mxo'on xa ndo' xa, cha tso'o wa mgondo' xa di'izh ten Cristo, ta mbidi'izh Pabl ndo' xa zha na nkeanyaw xa Roma. Le'a git ndee mtu'ub Pabl go'o Onésimo ndo' Filemón gezh Colosas. Unab Pabl ndo' Filemón gunge' ladna xa ndo' Onésimo, utsin gunno xa xa ta na no xa nak xmen Cristo. No ndab Pabl le'a tal ncho xta'an mbinno Onésimo Filemón natal xta'an nsa'ab xa le'a Pabl skixka ta wa. Ndab Pabl le'a bexa nak xmen Cristo dubtsa nak, guni'i tal xa xa rik natal na'an.

Pabl nidi'izh ndo' Filemón

¹Le'a na' ndee Pabl xa nkea litgi'ib ke na ndun na' ti'in ten Jesucristo. Le'a na' no Timoteo xa nak cuent dub wit na', nke'la besa git ndee ndo' lu Filemón, lu no ndun ti'in ten Cristo.

²No nidi'izh besa ndo' Apia xa nak cuent bsan beuna, no ndo' Arquipo xa no ndakno beuna ndun beuna ti'in ten Dios, no ndo' itea bexa nzhealbe ta lid lu ba'.

³Na'ab na' ndo' Dios Xus beuna no ndo' Jesucristo Xwan beuna utsin gak bexa ndo' bega, no gun bexa wen yoo ladna bega.

Filemón nkwea' ladna be ltsa'a na

⁴Le'a gor na ndadi'izhno na' Dios, na'ab na' ndo' Dios gakno Dios lu, no nsa na' xno ndo' Dios, ⁵geal le'a na' ndón xte'e ndankea lu Jesús Xwan beuna, no nge' ladna lu xa, no nkwea' ladna lu itea bexa nak xmen Jesús. ⁶Na'ab na' ndo' Dios le'a ta na dubtsa nge' ladna beuna Cristo, ta we'e le'a lu

mas igondo' ta wen nsa'a Dios ndo' beuna nak xmen Cristo. 7Uzhebpa nten ladna besa no mas nsen besa juers, gor ndo'ón besa xte'e nkwea' ladna lu be xmen Cristo, le'a lu ndun mas utsin nyo'o ladna bexa.

Pabl ndab ndo' Filemón utsin gak ndo' Onésimo

⁸Le'a ta na nak beuna xmen Cristo, ta we'e syo'o gan inibe'e na' ndo' lu ta nsabndo' gun lu. ⁹Ná le'a na' ndi na'ab ndo' lu, geal le'a na' uní le'a lu nkwea' ladna na'. Le'a na' Pabl yá xa gox na', no nkea na' litgi'ib ke na ndun na' ti'in ten Jesucristo. ¹⁰Nat na'ab na' ndo' lu utsin gak lu ndo' Onésimo, le'a xa nak cuent dub xi'ín na', ta na mbingea ladna xa Jesús len litgi'ib ndee.

¹¹Polta le'a Onésimo na'anpa utsin ngun ti'in ten lu. Ná nat le'a xa su'u gun ti'in ndo' lu, lak nsu'u xa ndakno xa na'. ¹²Le'a nat le'a na' utu'ubgal xa ndo' lu. Cha utsin gunno lu xa gor ilansea' xa, lakta utsin ndanno lu na'.

¹³Le'a na' nlad yanyo'o Onésimo wats na' sa ndee, ndontsa gakno xa na' sakndo' lu, ndalen nkea na' litgi'ib ndee ke na ndadi'izh na' di'izh ten Cristo. ¹⁴Ná le'a na' na'anpa gáp yanyo'o xa sa ndee tal le'a lu lá nlad. Le'a na' nlad gun lu ta na'ab na', parea na'anpa ta na juerska li gun lu, ndi ta na nlad lu li gun lu. ¹⁵Natal ga ta we'e mla'a Onésimo lu dub nde'epsta, natsa bi le'a itancha' xa ndo' lu idub tiemp. ¹⁶Nat



Pabl nke'a dub git go'o Onésimo (Flm. 1:12)

le'a Onésimo na'anpa yak xa nduntsa ti'in ndo' lu. Nat le'a xa no nak dub xmen Dios, cuent dub wit beuna xa. Le'a na' uzhe'eb nkwea' ladna xa, ná le'a lu nsabndo' mas ikwea' ladna xa, le'a xa no nak xmen Jesús, no nak xa dub xa ndun ti'in ndo' lu.

¹⁷Tal lu nsak le'a na' no nak ltsa'a lu, utsin binno Onésimo lakta utsin nak lu ndo' na'. ¹⁸Ná tal xa xta'an mbinno lu polta wa natal xa nsa'ab ndo' lu, le'a na' skixka ta wa. ¹⁹Le'a na' ndee Pabl ya'a na' nke'a na' letr ndee ndo' git: le'a na' skixka be ta nsa'ab Onésimo ndo' lu, maska uni'í lu le'a lu no nsa'ab ndo' na'.

²⁰Le'a ta na dubtsa nak beuna xmen Cristo, na'ab na' ndo' lu gun lu ta wa, ndontsa wen yo'o lad na'.

²¹Nke'a na' be ta ndee ndo' lu, le'a na' uní le'a lu sunka ta na'ab na' wa, no gast mas sian be ta wen gun lu. ²²Bsaxkwa'a dub sa yo'o na', le'a na' nsak le'a Dios ula'a gal ina' na' bega lak nab bega ndo' Dios.

Be ta lult mke'a Pabl ndo' Filemón

²³Le'a Epafra nidi'izh ndo' lu, le'a xa nkeano na' litgi'ib ndee ke na ndun xa ti'in ten Cristo Jesús. ²⁴Nsea Marc no Aristarco no Demas no Luc bexa ndakno na' ndun besa ti'in, le'a bexa wa no nidi'izh ndo' lu.

²⁵Na'ab na' ndo' Jesucristo Xwan beuna mas uzhe'eb utsin gunno xa bega. Lika gak-a.

Las ilustraciones de las páginas 4, 6, 10, 24, 27, 44, 51, 83, 90, 92, 95, 96, 108, 126, 144, 154, 159, 161, 170, 183, 195, 221, 224, 242, 251, 253, 276, 286, 305, 308, 314, 318, 320, 324, 340, 346, 354, 355, 360, 368, 370, 374, 391, 398, 399, 493, 524, 555, 567 y 645 son propiedad de ©1978 David C. Cook Publishing Co., y son usadas con el permiso correspondiente.

Las ilustraciones de las páginas 64, 66, 131, 279, 330, 421, 426, 488, 497, 515, 583 y 585, por Louise Bass, son propiedad de ©The British & Foreign Bible Society, 1994.

Las ilustraciones de las páginas 296 y 641, por Horace Knowles, son propiedad de ©The British & Foreign Bible Society, 1954, 1967, 1972, 1995.

Primera edición
El Nuevo Testamento
Zapoteco de San Vicente Coatlán
zpt 14-105 5C
©2015 Wycliffe Bible Translators, Inc.
Versión electrónica ©Wycliffe Bible Translators, Inc. 2015
www.scriptureearth.org

Usted es libre de: Compartir – copiar, distribuir, ejecutar y comunicar públicamente la obra bajo las condiciones siguientes:

Atribución. Debe reconocer los créditos de la obra de la manera especificada por el autor o el licenciante (pero no de una manera que sugiera que tiene su apoyo o que apoyan el uso que hace de su obra).
No comercial. No puede utilizar esta obra para fines comerciales.
Sin obras modificadas. No se puede alterar, transformar o generar una obra derivada a partir de esta obra.

<http://creativecommons.org/licenses/by-nc-nd/2.5/mx/>